



Hapšenjem narkobosa i njegovih dilera zadat ozbiljan udarac narkomafiji u BiH

# KURTI IZ KPZ-a ZENICA VODIO TRGOVINU DROGOM

Uhapšeni Ganija Kurti iz Crne Gore, te Jasmin Selimagić iz Prijedora i Anđelko Novaković iz Bosanske Krupe. Kurti još 2012. godine osuđen zbog trgovine drogom i deportiran iz BiH, ali se uskoro vratio s lažnim dokumentima, nakon čega je ponovo uhapšen

**H**apšenjem jednog od vođa organiziranog narkokriminala u našoj zemlji, te dvojice njegovih dilera u Bosanskom Novom, istražitelji **SIPA-e** i Tužilaštva BiH zadali su ozbiljan udarac narkomafiji u BiH.

## Droga i oružje

Kako saznajemo, uhapšeni su Ganija Kurti (1969) iz Nikšića, državljanin Crne Gore, te Jasmin Selimagić (1987) iz Prijedora i Anđelko Novaković (1985) iz Bosanske Krupe, a obojica nastanjeni u Bosanskom Novom.

Istražitelji su osumnjičenu trojku pratili još od 2014. godine, a u jučerašnjoj akciji hapšenja učestvovalo je više desetaka policajaca. Uporedo sa hapšenjima, policajci su pretresli četiri lokacije i tom prilikom zaplijenili određenu količinu droge, automatsko oružanje, municiju i mobitele, koji će poslužiti kao dokazi u daljem postupku.

- Tužilaštvo BiH je zajedno sa **SIPA-om** i partnerskim agencijama iz Crne Gore provelo detaljnu i temeljitu istragu tokom koje su prikupljeni dokazi da je spomenuta trojka krijumčarila veće količine marihuane i skunka s područja Crne Gore u BiH. Krajnja destinacija za drogu bilo je

narkotržište u sjeverozapadnom dijelu naše zemlje - saopćeno je iz Tužilaštva BiH.

Ganija Kurti je zbog poslo-

va s drogom i ranije hapšen. U **SIPA-inoj** akciji od prije četiri godine uhvaćen je kod Trnova sa 10,6 kilograma marihuane. Tokom sudskog procesa u Sudu BiH 2012. godine priznao je krivicu, te je osuđen na četiri godine zatvora i deportiran je iz BiH.

U međuvremenu, Kurti se ponovo obreo u našoj zemlji i to sa lažnim dokumentima, te se našao iza zatvorskih rešetaka KPZ-a Zenica. Dosadašnjom istragom utvrđeno je da je on upravo iz zatvora, putem kontakata u Crnoj Gori i BiH, koordinirao krijumčarenje droge u našu zemlju.

## Mladi ovisnici

Istražitelji su otkrili da je osumnjičena trojka u više navrata krijumčarila više kilograma ove opojne droge, a osumnjičeni Selimagić često je, radi nadgledanja opojne droge i njenog transporta, boravio u Crnoj Gori.

- Ovom akcijom zadat je odlučan udarac strukturama narkokriminala koje djeluju u sjeverozapadnom dijelu BiH,

a čiji su konzumenti opojnih droga uglavnom mlade osobe iz Bosanskog Novog i okolnih mjesta - naglašavaju iz

Tužilaštva BiH. Nakon što osumnjičeni budu saslušani u Tužilaštvo BiH bit će odlučeno o mjeri pritvora. **Z. Đ.**

## RANIJE HAPŠEN I SELIMAGIĆ

### U poker-aparate ubacivao češke krunice

Policijski dosje već ima i Jasmin Selimagić, koji je hapšen u martu 2011. godine zbog računarske prevare. On je tada s Mladenom Mladićem i Sašom Đukićem u jednom klubu u poker-aparat umjesto kovanica od jedne marke ubacivao kovanice od pet čeških kruna.



Osumnjičeni uhapšeni u akciji SIPA-e

FOTO: ILUSTRACIJA